

四庫全書

集部

欽定四庫全書

御定歷代賦彙卷五十四

禎祥

紫玉見南山賦

以由德通祥至  
如影響為韻

唐李觀

南山之陽何珍不藏昭皇家之至德發紫玉之禎祥  
熒子千岩動色炯炯子萬壑生光映于林謂羣鳳之集  
上據于石辨衆珉之居旁固已聞於往牒遂薦臻於我  
皇稽夫所自無脛而至每隱曜而不欺曷招攜之可致

所以瑞於有道將委質而式孚出非其時則韜光而自  
棄南眺穹崇玉見於中貞姿豈琢勁質非礲遠而望焉  
與彩雲而搖曳即而察也雖嘉氣之蔥龍對白壁而即  
異配玄珪而攸同故瑞無應而不至事有感而遂通通  
人莫測孰知其色由是王者憑之而致理君子觀之而  
比德明琬琰之在茲豈瑕瑜之有匿原乎玉之處幽儉  
德是修德表玉而應瑞玉用德而降休蓋真宰之潛運  
知神功之所由不然安得揖至寶於潛谷闡皇風於大

猷而已哉若乃外徹中朗冷然如響佩服之處雖貴乎  
山玄抵鵲之時罔懷於土壤大矣哉瑞無常居因化所  
如惟德是依彼自彰於符契不貪為寶我何待而沾諸  
故客有觀光而歌曰歸太素子遠蠻屏有瑞玉子見霄  
嶺浮紫氣於雲際混清輝於水影庶南山之不騫期我  
皇之惟永

咸陽獲寶符賦

唐  
闕名

君生人者在乎寶位守寶位者在乎靈符鎮四海而收

重臨萬方而作孚時或遭逆暫淪精於甸邑道將昭泰  
旋應德於皇衢日者虎師犯順賊臣附進隨黃鉞以外  
遷與翠華而西幸苟遇運之云否將隨時而匿影忽影  
脫於金繩遂沉埋於土梗既而寇盡天府駕旋京師衣  
冠再朝於紫殿文物重布於丹墀聖上愍茲符之闕遺  
恒寤寐以求之結精誠而仰望契幽昧以思惟皇心退  
修已聞於其政神器大集又叶於其期其形欲呈其氣  
先覲何五色之可愛與三光而相射光凝渭濱之苑宜

玉樹之青青媚貫王都之川狀銀河之奕奕載求載索  
甸人斯獲捧之而片月下來懷處而長虹上格臨宸宸  
同舜德之文明照階墀叶堯心之光宅玉鈕惟舊芝塗  
尚新螭文外發鳥篆中陳題為天子之寶實撫遠方之  
人彼之近縣俯接城闔我唐既斬虜將於橋上漢氏亦  
拜單于於渭濱不然者曷不呈於異境而見於他辰者  
也當其大君出令布蠻夷之政匪我無以重其成命遠  
人底寧執玉帛於庭匪我無以闡其威靈足知寶符之

復光我昭代唐雖舊邦其命惟再頌聲作於外喜氣溢  
於內藏之王府將神鼎以俱崇列彼帝庭與寶圭而相  
對盛矣哉我唐之景祚信三皇之作配

昆田化為金賦

以祭祀明潔神  
化之金為韻

唐闕名

地有百瑞美者惟金其見寡其應深故因神而呈足表  
至誠之道從物以化更彰肅祭之心其祭惟何首山之  
事其祭則那我皇所致始馨香以享德終潔敬而展意  
向清漢以式瞻庶嘉祥於一至於神報以福帝受

以蘆昆田之上金化於茲考出地之形時則亡也觀從  
革之狀維其有之原其始也未辨厥名莫知其價紛雜  
乎珍異昭彰乎晝夜呈祥於氏雖得神而生入息於時  
亦待神而化及其變也倏忽而成爛然而明初比粟而  
散點竟如螢以亂呈昔混丹砂南面之虔誠始荅今輝  
瑤草四方之正色遂生山下熒煌田間昭晰向曙而野  
花齊媚入暝而天星共列祥風拂而逾麗瑞露濡而更  
潔至若隨車表舜還雨來秦或因初以出或從木而陳



未有還移以禮變化從神以彼瑞為茲瑞易前珍為後  
珍則知寶非神而不見其祥神非寶而莫臨其祭訪古  
而昆田宛在閱史而清風不替別有泥沙久沉光影常  
翳顧茲神之所開亦化形而表帝

梓潼神鼎賦

以靈瑞珍  
寶出為韻

唐 盧 庾

於戲德苞生植者不能動彼天之道瑞及飛走者未能  
感無一之寶故知瑞之大者下及無心之金石德之深  
者上合不言之玄造我國家高選物理光天順人膺景

命闡坤珍由是函谷關旁靈符出而啟聖梓潼郡內寶  
鼎光乎取新此鼎者聖人之大寶有國之神器量則弘  
深體乃殊異嶷如斷山之齒岸屹若巨鼇之巔厥峙其  
足者可以象三德虛其心者將以含萬類不汲而滿不  
然而沸內烹飪以養賢上歆雲而作瑞應火木之卦既  
調鹽梅鏤山川之容且禦魑魅是鼎也豈徒靈感亦有  
歟識不假雕鐫宛然文字實彼天之所錫表吾君之至  
異揭五百代之昌符成六萬年之寶位與夫遷鼎郊廓

卜代三十卜年七百者不可同日而議宜書於冊於帝之庭以合明應以昭神靈士有聞而歎曰昔黃帝作寶鼎三秦帝奠神鼎一周之衰也沉泗水而隱藏漢之盛也在汾陰而見出未有能來聖壽之無疆應人文以純吉竊亦欲負鼎於明主啟心而獻術若能使我徵於有商豈見遺於今日

汾陰出寶鼎賦

以皇漢之道神鼎斯出為韻

宋

文彥博

至德昭彰炎靈道昌當汾陰而展禮見寶鼎以呈祥有

感則通表承乾之穆穆為時而出彰負康之皇皇昔孝  
武以運繼東周位崇西漢居尊克務於兢業臨下彌勤  
於宵旰崇諸厚德俾遠邇之悅隨祀彼方丘冀人神之  
幽贊禮斯盛矣神惟享之允降穰穰之福靡愆抑抑之  
儀由是睢丘之畔汾水之湄仰窺乎天見黃雲之繚繞  
俯察於地得寶鼎以瑰奇莫不煥金景之榮光蔚龍文  
之麗藻非惟啓於至聖抑亦見乎有道寧虞履餗寔天  
地之殊祥不假銘功乃邦家之盛寶偉夫萬方悉慶百

辟咸欣非鑄鼎以象物蓋至誠之感神瑞啟明時豈類  
宗周之寶天祚皇德實為巨漢之珍是何澤及坤靈祥  
昭金鼎固莫量於輕重又難偕於奇挺載於瑞典非遷  
洛以堪同獲彼靈祠豈於湯之足並不然則又安得並  
芝房而薦廟配白雉以陳詩於以顯皇化之廣運於以  
昭聖政之無私嶽修貢而川効珍徒虛語耳鼎取新而  
革去故何莫由斯美夫祀事聿修休祥有秩非勞九牧  
之貢自顯三材之質所以標瑞牒而紀祥經彌萬代而

首出

丹甌賦

以國有豐年為韻

唐薛邕

神物昭見聖人是則五位時序兮萬邦以寧百祥薦臻  
兮一人之德鼓茲靈器呈我王國有物有憑匪雕匪刻  
察其狀而玄妙相其儀而不忒諒幽贊而克成矧徽猶  
之允塞是知奇制可久嘉名不朽類君子之心以虛而  
受同至人之德終善且有既應盛而自滿不假於盤瓶  
亦詎炊而自熟何勞於薪楨擬神鼎之有用掩歌器而

無咎豈以塵見范丹之空賂為紀國之醜者矣且夫清  
明在躬符瑞由衷誠之必感感而遂通獻白環於重華  
克明濬哲錫玄珪於文命告厥成功此唐堯之表貺蓋  
王母之欽風曷若自然挺出為瑞斯崇其應不昧其用  
無窮莫因埏埴寧俟磨礱以彰我君聖以報我年豐而  
已哉客有賦而歌曰玄德日用兮象帝之先丹甑時見  
兮神物光妍中含虛兮體道上應規兮法天染人無所  
施其彩飾陶人無所効其貞堅以享以孝兮可以饒饒

多稼多黍子屢茲豐年

丹甌賦

以國有豐年為韻

唐史

翽

皇矣上帝臨下有則玄德升聞榮問充塞三光明而品物昭報四氣序而黎人不忒雖休勿休惟靜惟默偉夫自然之丹甌方作瑞於明德應皇運而無疆報時豐於有國其業可大其功可久既申命以自天類有孚而盈缶循環外映爰假象以為名濩落內虛信當無而入有明夫既耨既穫表此不稂不莠將有開而必先固茲器



之可守天應靈貺人期至豐不汲而滿將寶鼎而齊列  
不炊而沸與溫泉而比崇異鈞陶之有作符造化之為  
功千箱以之而發詠萬姓無嗟乎屢空且夫人為國本  
食乃人天朝有代耕之秩野多擊壤之賢豈不以休徵  
畢至瑞應無邊正色斯呈以明於聖感天資可尚是表  
其豐年影亭亭於瑞日光泛泛於祥煙九功咸序八政  
攸先超三皇而軼五帝尚何足夫比肩

仁壽鏡賦

有序

唐闕名

天寶初有獻書闕下者言巴蜀之間有石鏡見於巖之  
半仁壽之字昭然可觀僕深竒之因而為賦

主上恢大寶闡鴻休仁風揚而玄德布壽星輝而皇化  
流故得靈仙啟瑞石鏡涵秋無往不形鑒乃侔於止水  
有鼎而應道可喻於虛舟懿夫化自天鈞質非鎔造亭  
午光射靈朝曙早來洞穴之九仙對商山之四皓炳崑  
崙之龍燭倒風壇之竹埽光能照乘不遺罔象之珠跡  
在幽巖為啟崆峒之道動如秋水之澄皎如寒雪之凝

駐清夜之圓月掛長河之片冰其形不由於拂拭其勢  
豈假於鈎繩君則無心惟德之斯感山非自爾喜神之  
有憑左援吟右虎嘯萬籟相聒羣容必召雖復晉有金  
飾之美魏有銀華之妙何如庸魅而野鹿羞窺愛舞而  
山雞自照昔之寫形仁壽見瞻咸陽倚玳瑁而稱麗掛  
珊瑚而益光名傳歲月事著縑緗咸播美於前古孰歸  
功於我皇鏡為之鑒與明德之合符石類於金惟聖躬  
之初應可以示後世之千葉可以軌前王之萬乘紀事

之簡以光良史之書頌美之詞更動詩人之興法天法地之謂仁不騫不崩之謂壽惟仁也故能昭泰惟壽也故能長久萬人咸識鄙石室之仙經六體自然輕漢園之卧柳我大君猶抑而不納謙而不有小人無益於補天庶斯文之不朽

西王母獻白玉琯賦

以聖道昭格神物呈祥為韻

唐高郢

君有德兮必體道以傳芳物有靈兮必順時以呈祥君感物而德著物應君以名彰於皇有虞道光先聖既受

終於納麓乃禋宗而齊政光被人神澤周遐夙故得靈  
祥効祉西母來朝霓裳璀璨羽服飄颻駕鸞鶴兮御松  
喬陵碧落子戾丹霄宴瑤池於旭日賓魏闕而崇朝其  
始至也天地氤氲彤庭赫其奕奕其既覲也堦墀皓旡  
素琯爛其昭昭已而森列夔龍張皇金石仙侶齒於臣  
位靈物陳其賓席真質貞明神光激射可使青瑣失翠  
丹墀罷赤舞獸見而迴眸儀鳳觀而委翮信希代之名  
寶旌有虞之光格若乃虛心守白圓質懷貞功高律呂

用等權衡價奪崑山之價聲如嶰谷之聲則趙之璧楚之珩杯遇殷而入用玦因魏而來呈雖見稱於中古固難可而與京是知琯之為物信其直而不屈琯之既神乃歷代而可珍始與時而沿革竟隨物而沉淪否不可終得之於道既逢奚景之賞寧從卞和之抱人亦如斯堅貞美好願同和而見用以窺天而不寶

白玉琯賦

以神人來獻以和八音為韻

唐王起

玉琯絕倫受之於神希夷感化皎潔含真既比德而為

美亦諧音而可珍肇自篳絕發茲璘玢匪剖石於和民  
乃成器於羽人伊昔帝鄉所傳王室未獻虹彩潛射蜺  
旌並建鸞鶴映之以生光煙霞奏之以適願同鈞天之  
樂靈境獨聞在層城之宮人寰共遠既而舜德有感王  
母來過獻之皎皎捧之戔戔重華遂得其符瑞百靈永  
謝其琢磨儻比以為笙知鳳吹之不遠如秉之為笛曷  
龍吟之足多豈徒嘒嘒於茲竹碌碌於隨和若乃觀其  
戾止察其所以質非竽籟韻含宮徵圓其表而合規虛

其中而通理光連素手雖提握之不忘色映丹唇在吹  
噓而成美其舍也無聲之樂其獲也無疆之祉虛而不  
屈老氏之篇乍同磨而不磷戎人之環孰比況乎知白  
自守無瑕可猜色迷瓊樹影雜瑤臺懷清越之音不求  
於扣感馨香之德不召而來固仙侶之所執非玉人之  
取材則知素琯之祥玄理可察將使律合於六音諧於  
八傳真人之逸韻資聖主之大夏宜乎藏九重之深為  
百代之欽騰輝爛爛和俗悃悃使伶倫之簫自慙叶律



俾女史之管空媿垂箴無以窺天之心而忘至德之音

玉雞賦

以祥瑞之氣因孝而至為韻

宋 文彥博

王者尊臨四海孝治萬方握金鑑以御衆威玉雞而降  
祥將韞櫝以強名寔資光潤假棲壻而賦象用表飛揚  
原夫翼翼奉先孜孜繼志允彰恭己之道克協因心之  
義精誠能格於上天和氣遂鍾於下地非煙非霧倂攻  
石以騰輝將翺將翔狀銜珠而為瑞油然生也仰以觀  
之或縹緲以瑜潤或氤氲而翼垂籠漢室之飛鳧高呈

蔥鬱映周行之振鷺俯煥羽儀奕奕堪嘉溶溶可貴混  
銅龍於博望蒙金雀於象魏有道則見寧同野馬之光  
為時而生宛類白虹之氣來豈無為至實有因且非求  
於照廡亦無假於司晨雖名符於五德蓋瑞應於一人  
將紫氣以俱浮度關寧辨與青雲而共散舐鼎相倫旌  
此至誠表乎篤孝標名且異於石燕窮理亦殊於霧豹  
輪囷乍布輝山之美應同蟻蠊暫收斂翼之儀是效能  
致此者夫何偉而誠日烏之可遂諒天駟以難追湛露

宵零已類寄流之際長霞曉映還符繫火之時偉乎呈  
瑞不羣凌空有異非醇化而不顯故曠代而罕至吾皇  
以孝德升聞茲玉雞子來萃

醴泉無源賦

宋 王禹偁

泉本靈長皆從濫觴何無源而自湧應有德以呈祥厥  
味孔甘可飲九苞之鳳其波不濁寧朝百谷之王豈不  
以地乃至柔水惟善下不愛其實於以光乎聖人感而  
遂通於以歸乎王者但沸涓以出焉奚疏鑿之謂也神

化難知汪洋在茲視之者孰分似帶挹之者咸謂如飴  
匪自高山非貳師之刺矣不居絕塞豈耿恭而拜之有  
以見德及於地不期而至其潤也齊乎聖澤其湧也偕  
乎睿知浪井不鑿我則同出而異名靈芝無根我則重  
祥而疊瑞稽夫是泉也其源不見於義則那其味且旨  
在理云何得非源之隱也與凡流而有異味之美也表  
聖德而靡他不然又安得匪因掘地而自可蠲痼者哉  
出鳥鼠者匪吾之耦產蛟龍者亦孔之醜鄙河水之九

曲笑涇泥之一斗自然而非有而有考乎支流應居  
水府之先效彼休禎合列祥經之首是何不在高原波  
騰浪翻孰知乎桐柏孰謂乎崑崙任大禹之功深寧歸  
畎澮縱張騫之力盡曷識根源士有自立身謀非因世  
本桴學海以斯久導言泉而漸遠期作瑞於昌朝免常  
流之一混

甘露賦

有序

明楊士奇

臣聞武備國家不可一日忽忘者也自黃帝至於文武

數聖人皆以之安天下易曰除戎器戒不虞書曰克詰  
爾戎兵詩曰以作六師若春秋禮所載講武之法尤備  
故武者所以保民禦侮安內攘外之大器也洪惟皇帝  
陛下臨御以來薄海內外咸歸德化尊卑大小安分循  
義耕食鑿飲朝怙夕嬉陛下聖人之心宵旰惓惓謂天  
下雖安不可忘危時雖無事不可忘武陛下此心即隆  
古帝王憂勤惕厲之心所以為國家生民造太平無窮  
之福者也夫有至仁之德者必有至和之應乃永樂十

年十月丁丑車駕狩於武岡之陽講武事也先夕甘露降茲山戊辰狩陽山甘露復降臣謹稽載籍有曰君治政平甘露降又曰帝王恩及於物順於人而甘露降又曰聖王之德上及太清下及太寧中及萬靈則膏露呈瑞凡此皆天地至和之應陛下至仁之所致也臣士奇幸叨侍從目覩盛事心切忻懌謹撰瑞應甘露賦一首上進賦曰

聖人膺乾符御九五溥帝澤肅皇度弘德化於萬方明

威令於率土盛矣哉治平之世超漢唐而躋邃古也惟  
皇聖德同符舜禹功愈大而愈恭恒存戒於滿假肆服  
外以安內兼修文而講武蓋將奠斯民於衽席之安而  
壽宗社於磐石之固也於時寒霜既肅孟冬維敘百穀  
登場三農畢務順上天之時令考聖王之典故將簡閱  
於司徒而狩田之爰舉也吉日丁丑式啟鸞輅風伯警  
途雲師先御左翼青龍右衛白虎前導後從丹鳳玄武  
千乘萬騎疾馳電驚至夫天璽之東武岡之陽翠華於



是而駐焉粵茲山之先夕煥幄殿其夙具風清冷予淑  
穆月皎潔予不霧直抵北之一星耿煌煌乎天乳旦而  
視之岡巒之表松柏之樹已厭浥乎甘露矣輕若霜凝  
濃若雪積散若玉屑圓若珠綴霏柯撒條比比而是蓋  
芳飴不足以餒其甘醖醕不足以喻其味於是六軍驚  
異歡賀拜跽山呼谷應天子萬歲天子於是更龍袞乘  
飛黃從造父御王良升高眺遠周覽四方紛營隊其整  
列森部伍之分張震笳鼓予遏雲凜戈戟兮飛霜布儲

胥子四合渺且網子彌岡乃有上公徹侯材官騎士分  
馳方攘環驅迤靡追奔載翔習霍迅駛於是金狸玉兔  
赤豹青兕麋鹿麋麇白鴈文雉倉皇怖懾氣奪魄褫或  
跳踉而未已或蒙茸其猶起矢不虛發一發五殪槩不  
虛擲應擲遄斃巧捷妙中闢翕變態殺獲生繫蓋不可  
為數計矣天子既嘉雄武之士尤重三驅之義乃下詔  
止焉於是時也物不窮殺農不妨耕將悅騁志士樂獲  
盈羣情快適笑歡沸騰天子於是命衆撤營旋駕都城

升金根之車鏘鸞和之聲揭日月之旗揚析羽之旌鳴  
鐃疊鼓條暢鏗鉤不亟不徐雍容安行歷東華登大廷  
御黼宸朝公卿文武濟濟介冑弁纓以及海外遐裔藩  
王陪臣莫不舞蹈上壽同聲一情皆以謂天子致勤武  
事篤在保民感至和之瑞而兆國家生民萬億年太平  
之慶也猗歟盛哉昔之子虛上林羽獵長楊馳騁浮詞  
以誇詡弋獵之樂殺獲之富游觀之奇而其實無所取  
徵者彼安知聖王至仁盛德上契乎天心天人協和靈

瑞駢應者乎臣職詞苑躬覩嘉祥稽首陳賦繼以詩章  
詩曰天子仁聖保康兆民民之允懷皇天維親至和萃  
靈嘉祥駢臻介福穰穰天子聖仁又曰明明天子受福  
於天德威所被下竟八埏內固外順宗社奠安聖子神  
孫於千萬年

神著立賦

有序

唐  
潘炎

景龍三年九月十七日上使韓從禮著筮卦未成著自  
立從禮曰大人之瑞也賦曰

惟彼神著生而有知用之不測明以稽疑擢九尺之纖  
榦伏千年之寶龜德圓而神兮無幽不及其生三百兮  
其用五十惟聖人之觀象乃神動而鬼入列八卦以效  
變翹孤莖而孑立數彰得一命乃自天同大橫之有夏  
表或躍而在田其察也深其功也大稱美名於神物齊  
妙用於神蔡是曰元后茲為筮從氣受陰陽夜分而彩  
露兼涵幽贊天地朝覆而輕雲數重著而有靈立定天  
保可謂神助用光天造功深莫善仲尼且許以鉤深屈

於不知太公徒言乎腐草著之立兮發其祥吾君得之  
尊以光明乎太極演彼歸藏因卜祝之符瑞應天人之  
會昌

莫莢賦

以呈瑞聖  
朝為韻

唐程諫

堯階莫莢子實稱休禎蓋歷代而難值至我后而斯呈  
植之以前墀左城映之而鏤檻丹楹激薰風而葉轉迎  
太陽而心傾日往月來深符大小之數時和厯應因見  
天地之情觀乎榮謝以月德為常卷舒以日數成類隨

初吉以增茂暄然自春度既望以漸零脩然如寄體盈  
虛而方同得道任消息而匪殊有智金波桂樹遠合象  
於彫榮炎漢芝房近方慙於祥瑞彼朱草與萐莆曷於  
茲而擬議則知聖作物覩物興由聖聖於赫而克著元  
亨物效祥而天莫之令然而莫之為應也博莫之為瑞  
也昭贊睿主則太平在通測陰靈則時變不遙初也則  
日益一日終也則宵盡一宵弱質浹金莖之露輕姿散  
玉戶之飈或曰麟在郊而合圖牒鳳來儀以聽簫韶雖

咸見而可貴於列迹而斯超豈如蒙賁著總集於厚地  
焜燿於皇朝

蓂莢賦

以呈瑞聖  
朝為韻

唐呂

諲

聖人法天兮無物不成皇天輔聖兮有貺必呈蓂莢之  
嘉瑞爰乃應乎休禎稟神靈以擢質因堯階而得名抽  
莖蓂蓂布葉莢莢二八而落三五而盈陰德自然仰蟾  
蜍而知晦太陽常近與葵藿而同傾爾乃丕體其祥博  
考其義所以厚上天之德所以表皇王之瑞其國亂也



則植之猶難其國理也則生之孔易惟我后之欽若亦  
合符而受賜承榮金殿旁沾三露之滋每奉玉階上蔭  
五雲之施豈無萱草以悅其性豈無靈芝以彰其盛芝  
擢其秀既以紛綸於策書萱樹於堂曷能彌縫於明聖  
未若棠蔕生於皇朝與夫髦士來應弓招受成於天諒  
多聞於國瑞託其得地且有異於山苗竊預談於皇道  
庶有望於遷喬

指佞草賦

以靈草無心有  
佞必指為韻

唐梁肅

聖澤濡煦于動植斯形相彼瑞草于逢時効靈體嘉生  
於浩氣秉植道於彤庭昔在堯帝至化惟馨伊屈軼之  
芳貞協王猷與國經有皇睿后德動杳冥二氣暢而羣  
生遂百祥來而萬宇寧矧夫佞者小人之道直者為國  
之寶雖糾正於邦憲實發明於瑞草象恭言偽於是焉  
去而勿疑葉布莖分何患乎辨之不早若乃一人當宁  
超黃越虞百辟來朝日臨雲趨風力論道伊咎陳謨瑞  
草在前疇敢以諛故曰物生於有有生於無感此變化

發為禎符不然彼植物之何知乃同功於帝俞天道不言聖人無心寓形闡教其用則深禾穎降於周王芝房發於漢后信呈豐子告慶并垂美於不朽彼直指以去邪諒於功乎何有我明主所以超三英之躅彼靈草所以為百瑞之首有由然也史魚守直宣父惡佞直不分邦家靡定惟草所指惟皇所聽指歸乎一聽戒乎失苟君道之不弘徒倚瑞以自必重曰曄彼草子直而指佞聖之瑞子時之理頌皇休子無極已

指佞草賦

以靈草無心有佞必指為韻

唐沈封

伊嘉卉予昔生軒庭蓋歷代而莫觀其狀至我后而方  
覩其形對右平與左城間朱草與彤庭薰風晝灑湛露  
宵零所以彰吾君之睿聖所以表吾君之德馨匪然何  
以於昭其異有赫厥靈根莖竦擢枝葉靜好惡夫佞允  
叶乎聖心作乎祥特異於靈草況今勤施五至克奉三  
無多忠良之士絕讒佞之夫非斯草之助化何以臻於  
此乎指佞之為德也廣指佞之為瑞也深逢聖斯生介

一人之景福有佞必指俾百寮而革心故能殊衆芳之  
質標羣瑞之首彼獬豸之觸邪抵罪在法則嚴伊平露  
之傾葉知方於人何有孰若我應明聖指邪佞昔之輔  
德告軒后之功成今也呈祥贊吾君之理定一名屈軼  
千載挺出有佞則指孰云無必豈比夫萋蒲空扇於堯  
厨芝房徒歌於漢室哉足以彰致理薦嘉祉君子在位  
我則恭默以傾心佞人入朝我則無私以直指信可以  
美芳聲於雅頌垂不朽於國史

指佞草賦

以靈草無心有  
佞必指為韻

唐

鄭 轅

旒扈肅誠天地降靈蓋臣咸造屈軼生庭翠影如植皇  
心以寧暑屏寒生感蕙蒲之代謝日來月往異棠英之  
飄零鳥奕玄造誕生厥草表忠蹇之不遲懼士佞之何  
早宵承湛露密葉如傾晝偃薰風纖莖若埽倚那且都  
歌詠難模其生也則一其道也乃殊育於軒階其指或  
有生於聖代其用則無是靈草之無心以聖人為之心  
對危行而不侮競巧言而則侵榮乎砌陰實為龜為鏡

肅我皇度式如玉如金冠弁之首繇代曠有茅三脊之  
可封芝九莖而延壽曷若茲草之盛莫之與並類貂蟬  
之性潔均獬豸之質勁得詩人之無邪行孔門之遠佞  
於鑠屈軼邈乎迴出遇唐復生應時作實經百王而影  
戢歷千祀而宥密如執法之不回奉直道而自必所以  
野退宵人朝多髦士同魚水之合契絕蟬蛸之莫指封  
思齊於大夫名可比於君子謝有香之蘭蓀惡無言之  
桃李

朱草合朔賦

唐  
韋模當

縣官執大法闡大猷道惟行遠化必通幽彼朱草以合  
朔示皇天之降休月始而生用資乎陰隲月虧而落事  
契夫冥搜其於作候靡或不由乃知天罔私親神惟輔  
德苟明智之有務必冥報而無忒或產水涯或生巖側  
布赤葉之雋練挺朱柯之翕赭既周復而莫窮與乾坤  
而不極誰究其義吾知其為美一人之化洽俾萬國而  
澤被由是節候不疑生榮以時依天聽以叶祉順月魄



以呈姿朔告合焉表皇化之無異草名朱也比丹心予  
自持較瑞不慙於蕙英稱珍豈讓夫靈芝觀其光彩妍  
媚文理密緻資亭毒以榮落以神祇之奧祕三五之前  
逐蟾光以潛長二八之後與桂華之暗墜匪權量之能  
侔將漏刻而齊致其氣芬芳其色焜煌聖帝攸感靈仙  
是常何纖芥之微物遇休明而効祥諒君恩之克播致  
天意之溥將可以同覩日月共貫陰陽豈止漬玄醴變  
金漿而已哉懿夫分莖灼爍擢穎超遙候朔自呈詎比

夫偶陽而動既望斯隕寧同乎見睍曰消幽玄不測神  
化孔昭自然澤浸有截化行無外三光並明兩儀交泰  
於靈草以配厯冠古今而為大

平露賦

唐闕名

惟唐累慶唯天眷命植平露之殊祥表吾君之睿聖不  
窺於牖可以辨百寮之賢不下於堂可以觀四方之政  
其儀可尚其義可覈平也者所以表太平之時露也者  
所以彰雨露之澤以此知庶類光贊神功昭格也希代

以出曠古而無空嘗覩於青史獨有驗於祥圖借如嘉禾合穗且生於隴畝萋蒲扇食未遠於庖厨孰與夫薦祉於彤庭之際含榮於紫殿之前亭亭莖擢的的規圓屬乾坤交泰風烈昭宣是以執正自守居中不偏偶香階之蓂莢對玉戶之賓連以承君顧盼以奉君周旋非夫聖哲首出英賢在位君臣同心上下一致五帝可以六三王可以四亦曷能感於茲瑞如或政有所缺道有未光則柢枝傾蓋應是知方寧茲物子自爾信有神子

所將似能存於炯誠豈獨效於禎祥客有聞之而歎曰  
於戲哉莫瑞匪靈匪聖莫丁偉茲平露卓爾祥經物之  
咸若國之康寧觀珍符之有炳敢不頌乎德馨頌曰官  
為賢子政無失君與臣子德惟一伊平露子應時出彰  
聖代子光史筆

靈芝賦

宋薛士隆

宋興二百有三年封陞載寧狼烽不驚上乃高揖凝旒  
棲神泰清天之與子法舜承堯祇載夔夔齋慄以朝帝

被袞章舁策寶列旄麾羅羽葆太師輔前少師保後工  
瞽登歌奉常贊道有覺彤庭皇拜稽首上天子之父號  
曰光堯壽聖太上皇帝母曰壽聖太上皇后宮維德壽  
康壽其堂色養無違儀刑四方二聖相歡用惟其至仰  
孝俯慈假天準地二氣之精百物之英誕秀靈草乘時  
挺生隆興惟甲申歲之陽義皇御寅斗直東方有茁者  
芝有粲其房不植不根於殿之梁輪囷扶踈馨香有馥  
紫色芬藍交光曄日歛騰龍而翥鳳追金相而玉質煥

耀宸居清明帝闔閱之者神驚瞻之者目奪一本同柯  
支生十二錯地分州蟠天列次瞻彼日月膺期嗣歲亦  
有律呂八音以諧仙館玉樓光於泰階皇帝乃命東觀  
啟鑰書披瑞命之篇參瑞應之圖驗通儒於白虎稽神  
契於孝經僉曰王者孝慈則芝茂又曰養老則芝生深  
仁是加於草木祥應是接於仙靈故肅宗養親而產延  
英之座孝武嚴帝而秀甘泉之庭於是聖心悅懌稱賀  
諡譚皇上賦玉華之詩太上發芝房之歌君臣動色室

家胥慶被之於服章聲之於謳詠蜚獠以之輸琛海波  
以之愉靜戴白之叟成黃之兒爰及閨房笑語嬉嬉自  
慶未始識也若豈天降而人為哉粵有狂生小子樂稱  
古德喜溢於顏憂形於色謂和氣致祥允天子之慈孝  
天施地產誠聖人之達德也乃若漢之宣章號稱七制  
仁民得天休符接至桓靈何道而產中黃之藏有芝英  
之瑞也由是言之妖祥叵測爾雅離騷乃尋乃繹乃列  
芝蘭乃識菌芝或云產於崑阿采於山而有之蓋希出

堂殿高華之所有沾濡鬱結而為曾胡多之可尚青龍  
之際乃一柯而三十有六支此何敬所稱生庭之怪草  
崔光以謂蒸氣而生之也乃其奇祥有取蔑聞往古方  
士多岐有傳漢武逮乎季末諛辭廣至鬼目呈符菌宮  
賀瑞豈黃精鉤吻有時而亂亦雞蘇薺苓有時而帝也  
於惟我后秉文之德昊天景貺三辰耀色雖無此芝何  
損於治生禁之庭亦孔之異此不可不察者誠何足以  
當上意也悵天居之高遠羌欲告而誰言聊陳辭而寫



志庶有發於塵編亂曰靈芝秀兮燦宮庭春秋易色子  
隨月而生神父慈兮君至孝貺珍符子天之云告我欲  
排閭闔子雲路迢遙物怪司閭子翹折之招爰攄懷子  
作賦儻六丁兮下來持去



御定歷代賦彙卷五十四

欽定四庫全書

集部

御定歷代賦彙卷五十五  
六

詳校官檢討臣劉炘

主事銜臣徐以坤覆勘

總校官編修臣王燕緒

校對官中書臣李斯咏

謄錄監生臣郭怡怡

欽定四庫全書

御定歷代賦彙卷五十五

禎祥

四靈賦

以麟鳳四靈王  
者嘉瑞為禎

唐  
闕名

於惟聖人之志氣如神百物自化四靈薦臻是以鳥獸  
浸其惠澤昆蟲懷其深仁福應尤盛休祥日新不然何  
以靈龜挺出飛龍來賓羽族降而集鳳鳥毛羣格而畜  
麒麟莫不率彼飛走荷此陶鈞或羣或友是擾是馴夫

其時然後動動而斯中叶休明之德邁川岳之貢負圖騰大河之龍銜詔引丹穴之鳳介蟲稱長將開奧以應期肉角為仁示有武而不用原夫契時也其感不一效靈也其數惟四為皇極之休徵作太平之盛事然後魚鮪不愆知化而鱗萃禽獸不戢懷德而磨至非夫天子睿哲黎元底寧惠化廣被品物流形則何能光有九土克擾四靈美玄功而不宰仰洪德而惟馨在郊藪則棲託以自適聞簫韶則率舞而來庭且如羲之道昌龍圖

有章似之功成龜書呈祥或馴麒麟或降鳳凰彼皆一  
者之或出未若四者之來王又若龍鬪鄭洧麟傷魯野  
鳳有咏何德之衰龜有靈而夢是假興宣父之歎運未  
遇焉叶夏后之祥道之行也出處則以待時乎隱見而  
允符王者聖德可大靈物可嘉遊宮沼兮騃騃無懼鳴  
苑囿兮鏘鏘不譁遼東獻豕又何足數越裳貢雉失其  
所誇惟明王之理天下也垂衣恭己修禮達義儀形陰  
陽昭蘇品彙天不愛道則乾符應命地不愛寶則坤珍

表瑞然後萬物可得而賓四靈可得而致

四靈賦

元林同生

乾清坤寧聖作物覩當四靈之畢來知萬物之得所欽  
惟皇上繩祖之武敷和氣於兩間播仁風於萬宇九淵  
之龍乍騰高岡之鳳時翥麒麟在郊神龜在渚繫泰和  
元氣之所鍾惟體信達順之所使彼昭昭之為靈驗皇  
德之遐著今夫神龍之英鱗族莫前或吟於雲或奮於  
淵昔龍師之紀號彰瑞物於萬年宣大易之取象首八

卦而為乾不有斯靈象數何先又若鳴陽之鳥集於高  
岡五音雖雖五采煌煌阿閣之遊嶰谷之翔雌雄奏和  
自成宮商使軒轅之作樂成律呂之短長不有斯靈制  
作未詳又若神龜見洛粲粲朱衣呼煙吸霧靈液霏霏  
綠文一出為偶為奇揭我九章示我民彝不有斯靈大  
範孰知又若麒麟在郊萬彙之英其象昭昭其角振振  
當周南之化美訖春秋之文成或播之詩或筆之經不  
有斯靈聖道何明雖然靈不自靈因人而靈聖人不作

靈物不與千載一時見於當今無為而化至治惟馨天  
不愛道甘露時零地不愛寶醴泉以生四靈駢萃宇宙  
文明而且賓興多士霧集雲從振關西之鳳起南陽之  
龍元龜五總舉真儒之用麒麟在閣圖當代之功使盛  
德之士同乎四靈者又可以彰聖治於無窮

四靈賦

元林仲節

維大鈞之播物差變化之不同雖偏塞之有間亦和粹  
之或鍾伊百獸之孰靈曰麟鳳子龜龍其靈伊何為瑞



孔多或出魯而降聖或鳴岐而應和或浮洛而薦瑞或  
出河而負圖德感而應者興二南之詠樂成而儀者紀  
帝典之書九江納錫昭土貢之盛六御時乘應乾德之  
符其為物也或毳而慈或羽而儀或鱗之長或甲之奇  
鱗之為靈也角不以觸趾不以踉蟲有生而不踐草必  
黃而後躋麟子麟子著於春秋子詠於詩鳳之為靈也  
體乃象德鳴子應時非竹實子不食微岡梧子曷棲鳳  
子鳳子文明之祥子匪德之衰龜龍之靈也神以妙物

澤以時或守國以紹明或雲從而天飛龜子龍子神  
化之盛子稽易而可知粵若先民傷時思昔紀禮運以  
成書表四靈之為德匪罟網之可求豈阱獲之能執若  
為畜而可馴乃至和而自獲彼昏不知孰明斯義誇元  
狩之瑞浪傳一角之奇紀五鳳之元徒取羽毛之異元  
君入夢騁畸說之荒唐夏積藏聚涉紀聞之茫昧下有  
繼誕之徒曲學之士束脯而食語有奇而不稽藻撓以  
居禮雖盛而匪智引筌而下料王子之空談網拔而飛

嗤晉人之妄議蓋故實者不求史傳之支離而必明經  
典之所指乃知禮經之言所以傷今思古而想像乎四  
者之為瑞也辭未竟客有謂余者曰子徒知昔人傷今  
思古而不思推古以證今也四靈以為畜則王者可制  
禮樂豈無其事而虛語哉洪惟聖神御四方而正四國  
張四維而立四極居四大而順四時敷四瑞而體四德  
乃若四者之應則麟鳳之在郊龜龍之在沼振振蹢蹢  
蜺蜺蛇蛇而不知其幾也今子徒騁五經之緒餘而不

觀文明之盛事辨紀傳之荒誣而不鑒德盛之所致誠  
下國之鄙人也賦者於是逡巡而起改容而謝乃續而  
為四靈之歌曰麟子仁子鳳子文子龜龍神子今世之  
珍子禮樂斯興道厥淳子於赫盛德維皇元子

青龍賦

魏  
繆襲

懿矣神龍其知惟時覽皇代之云為襲九泉以潛處當  
仁聖而覲儀應令月之風律昭嘉祥之赫戲敷華耀之  
珍體耀文采以陸離曠時代以稀出觀四靈而特奇是

以見之者景駭聞之者奔馳觀夫神龍之為形也蓋鴻  
洞輪碩豐盈脩長容姿溫潤蜥蛇成章繁虵蚪蟉不可  
度量遠而視之似朝日之陽邇而察之象列缺之光燦  
若鑒陽和映瑤瓊矚若望飛雲曳旗旌或蒙翠黛或類  
流星或如虹蜺之垂耀或似紅蘭之芳榮煥璘彬之瑰  
異實皇家之休靈奉陽春而介福賚萬國以嘉禎

周以龍興賦

以旋服國中位  
光鱗族為韻

唐  
黃滔

周以創三十代啟八百年既鳴鳳以授德復興龍而御

乾奔天下之二分豈惟雨驟擎洛中之九鼎寧止波旋  
當其韜仁聖以表威靈湧禎祥而呈氣色岐梁燿銜耀  
之所汧隴湛蟠泥之域幾年貪餌吞將呂望之釣一旦  
飛天霹破殷辛之國觀夫或屈或伸非假非真澤霈六  
合恩濡兆民以息虞芮作在田之跡以却夷齊為逆物  
之鱗掀陸海之波濤固殊鯨浪擴九重之宮室肯類鮫  
人則知指縱而或仗爪牙善戰而靡資血肉火兵戈而  
雖假燒尾鏡今古而未嘗寐日遂使盟津契會此時莫

愧於雲從羨里棲遲昔日何傷於魚服下蟄如此高翔  
曷量於蠻貊而蟲沙附申忠信而鬻鬣張足以雄飛革  
命首冠興王駕木德於震宮蒼然被彩應陽精於乾象  
赫矣飛光所謂建皇基立實位模日楷月規天矩地非  
三聖之尤異焉可以神物取類邈罔象乘鴻濛奔霆迸  
電驅雷走風非四靈之感通焉可以與周而同功豈徒  
角樹臣佐穴居域中拏開粟而攫散財滂沱有截壽九  
齡而泰十亂振奮無窮懿乎後煥放牛前光播穀愈彰

聖德於王者益驗神蹤於介族則老聃之道漢祖之顏  
永宜雌伏

黃龍見賦

有序

唐  
潘 炎

景龍二年秋九月五日黃龍見於上黨伏牛山之南岡  
留久之彰聖人之德也賦曰

龍之來兮乘其陽躍於泉兮臨高岡龍之至今歸有德  
符於黃兮土之色精曜曜光雄雄上不在天兮接於物  
下不在田兮蟠於空列四靈智稱其首居五位色表其



中將銜甲以無比與負舟而不同明皇家之王氣符歷  
數於聖躬飛煙噴霧若動若顧聲雖號號非同三尺之  
劍色乃煌煌下映五花之樹誠帝王之嘉兆寧朝夕之  
可遇何虵蠃之足言諒騰黃之匪喻同翠龜之薦綠圖  
彰大人兮告元符覽史墨之言未之聞也驗登殷之祀  
不其然乎

黃龍再見賦

有序

唐潘炎

景龍三年六月十五日黃龍再見於牛山天意汲汲於

聖人賦曰

龍之見也春分而登於天龍之潛也秋分而入於川假  
崇山而再見應元聖而通玄蜿蜒孤蟠雲霧四發目中  
精耀光飛列缺之火領下珠懸色奪蟾蜍之月方將游  
彼池圃豈徒止於郊野非同上天之五虵有異渡江之  
一馬孫權象之而置於軍中魏帝範之而在於殿下永  
言於此我皇是宜秦王之夢立乎廊時漢后之時見於  
成紀彼皆一至此則重光采色炫耀文明焜煌錯甲鏤

鱗既以來乎字分官紀號可以表其祥超紫鳳於丹穴  
越青鸞於女牀龍德相成而無悔天家久久而蕃昌

黃龍負舟賦

以克已勤物大  
川効靈為韻

唐呂

溫

夏后氏奠山疏滯拯溺開泰玄珪錫命既成天下之功  
黃龍發祥始躍域中之大當其駐軫江甸艤舟洪川天  
行健而時有未濟地設險而瞻之在前思利涉以撫俗  
遂精誠而告虔於是雲氣滃起神光爛然奮角於勿用  
之窟驤首於或躍之泉光波澄瀾奉天意以顯若拖尾

垂鬣夾王舟而負焉合靈符於百代表聖運於千年徒  
偉夫出無情馳不測如驅風雷若有羽翼觀竭誠以効  
用似就列而陳力電目流光金鱗耀色天吳奔走陽侯  
屏息巨險汔濟孰假剡木之能潛怪莫逢寧資畫鷁之  
息應變化以昭盛出沉潛而剛克其慶惟大賴祉福者  
兆人其觀惟榮執玉帛者萬國若非平土湮水泣辜罪  
已菲飲食以昭儉卑宮室而思理德掩乎生成之初功  
齊乎開闢之始安有非常之神物不召而萃止濟其不

通而彰其具美者也至若漢橫汾水秦抵滄溟實逞心  
欲匪崇德馨蒼生之虛瘁靡念方士之空言是聽始幸  
免於覆溺夫何望乎炳靈於戲勤罔軌模言非善教則  
人雖愚弱或使之而不効其志惟純其德孔殷則龍雖  
神化將不役而自勤信矣哉國家俾人其蘇在理無鬱  
超乎大禹不務舟車之勞蛻彼黃龍但為宮沼之物而  
已

赤龍據按賦 有序

唐潘炎

景龍二年夏四月十七日帝在廳事假寐白鶴觀道士  
宋大辯等三十人同見赤龍據按至矣哉神妙無方不  
可得而稱也

玄天之龍兮見而在田我后之龍兮飛以御天據聖人  
之大寶與列祖而同玄高出而潛躍以自試來定天寶  
居然假寐合而成體散而成章若窺於牖若施於堂且  
據按而向明負宸以當陽日月在身有祇天之嘉夢風  
雨合氣將振翼而雄驤羣居愕視聖作物覩赫然龍光

眞我明王折券表異亦惟前聞曠然振古卓有吾君王  
人之瑞比之龍首高居而遠望以臨乎九有天子之威  
比之龍鱗皇之可畏以肅乎萬人徒稱其象未覩其眞  
恭惟我后近取諸身於昭巨唐其命維新永據九五斯  
焉萬春

西海雙白龍見賦

以天下安樂龍見於海為韻

唐錢起

唐六葉嘉祉降皇威宣師出以律將有事於金天赫矣  
神武感通上玄雙龍呈瑞一色皎然惟白也昭素秋誕

聖惟龍也主殺氣清邊不爾者寧出乎海不躍於泉穆  
乎白龍之為物也潛依水德利用天下精異冥通騰驤  
神假苟非君行其道物有其官則鬱湮不育潢汙而蟠  
隱見罔知其旨窅冥孰見其端故我君宣八風之惠化  
澄四海之波瀾覆幬斯極生靈以安惟此上瑞灼然可  
觀其始見也精光曷耀溟澥清廓曳冰雪於半空晏雷  
震於萬壑若長雲帶冰而不散雙劍倚天而中落忽虹  
立而電迴其儀不可彌度表其祥同乘黃之偶運處其



度掩嘉魚之有樂偉夫鱗介之族莫智於龍苟靈應無  
兆豈休明再逢昔軒以負圖為景福舜以入壇為神變  
殊旨同歸千載一見是以天祚明德幽贊禎祥彼二龍  
之萃止合一聖之有孚皓爾其真異葉公之藻繪超然  
將舉同正理之友于是時也西戎駭目莫不感化而風  
趨夫如是則在宥之理足徵無疆之休可待洋洋歌頌  
日聞於四海者也

鳳凰來儀賦

以聖威時平樂  
和瑞集為韻

唐  
李  
解

至哉乎鳳凰之致也應運合符體中履正依道德以出  
處表帝皇之衰盛宣尼興歎見周道之陵夷太史正辭  
知漢德之明聖寄高跡於圖牒流遺旨於歌詠我國家  
化洽生成歸淳反朴理定制禮功成作樂萬物懷仁四  
靈沾渥方棲息於上苑寧徘徊於南岳觀乎肅肅其羽  
鏘鏘其鳴吸天地之嘉氣赴簫韶之雅聲知至道之可  
樂識泰階之已平身安撫馴或顧步以屢舞心畏榮寵  
乍聯騫而若驚寧同衆鳥之德竊比達人之情且如六

翮已成五文畢備奇姿委發逸志殊類挹寥廓以推靈  
向人寰而作瑞籠檻不能展其巧羅網無以施其智豈  
若翡翠以美色殺身鸚鵡以能言剪翅鴻鵠以稻粱自  
苦鷹鷂以擊搏取類孰與夫退則全其性出則得其時  
將稱年以表德豈反袂以等期夜宿椅桐之枝朝餐竹  
實之粒望雙闕以上下先百禽而翔集薰風飄而響清  
甘露沾而羽濕對離景以照耀披慶雲而出入來儀則  
那樂我時和因物見志為鳳凰之歌歌曰處分明兮繫

舒慘一人慶兮萬物感羽族猶得以效珍微生何久於  
習坎

鳳凰來儀賦

元

汪克寬

有虞起兮歷耕重華煒兮文明袵衣絢兮斧扆時雍變  
兮八紘命后夔以和樂奏韶箎之九成致靈鳥之並集  
舞威儀於彤庭想夫鳴球戛擊絲桐振響搏拊胥諧咏  
歌迭唱先祖洋洋而格思羣后逡巡而揖讓宮縣斯設  
篳篥維樅峙崇牙之捷業蔚樹羽之衡縱瞽矇擊祝而

作作眈瞭播鼗以逢逢陰管駢歛於鐘笙金奏鏗鏘於  
大鏞變徵旋宮調律同之硯鰭執干秉翟列舞佾之從  
容導大塊之至和致象物之感通爾其九奏爰終于飛  
翔翥粲粲其章翾翾其羽覽德輝於千仞聿迴臻於殿  
宇九苞炫爛壯黃扉而裴回五色毳毼歷玉階而延佇  
儀容肅肅而雅馴翼翼衛蹌蹌而獻舞德侔君子恒揭義  
而負仁音協黃鍾婉鏗金而考鼓其為物也稟乎太一  
之粹孕乎丹穴之峯距弗履乎弱草味弗啄乎生蟲朝

憩崑崙餐琅玕之瑣碎夕游縣圃飲玉池之冲融首昂  
金雞之喙尾曳鯨魚之踪背靈龜而頷燕後祥磨而前  
鴻飛禽三百有六十而惟是之為宗爾其九官都俞四  
岳輔弼涇水懷襄而底平烝民艱鮮而奏食八埏皞皞  
而雍熙四海安安而寧謐帝舜之德殆不翅玄渾之并  
包與方儀之立極是宜太和之音始迭作於九變而太  
平之瑞駢雄雌而下集昔者軒轅施德聿巢阿閣之巔  
厥後岐昌修政爰止高岡之側羌至聖之致瑞實後先

而同轍迨夫時乖政熄代變風漓尼父興不至之歎接  
輿歌德衰之辭楚人山雞賜千金而誨諂西都神爵驚  
屢至而夸竒蕭史神仙之詆詭符秦謠識之支離偉我  
皇之聖明協重光於虞帝大猷昭黼黻之文雅樂應簫  
韶之制賜湛樂於吾民陶太和於斯世皋益接武而論  
思稷契駢肩而獻替願羽儀於天朝効鳴陽於盛際

鳳巢阿閣賦

以天下清泰神  
物來萃為韻

唐闕名

國家化協軒后道超帝先敷至德以被物降殊祥而自

天祥異宗周下岐山之鳴矣企觀宸極放阿閣而巢焉  
由是載止於甍次蓋將呈瑞於君前臨四榮而肅乎雲  
委播五彩而煥爾霞鮮且將巢者其義久也美德化乎  
宇內永栖遲於日下爰居爰處恒依應龍之祥載飛載  
鳴寧侶化鴛之瓦道既砥平時亦鏡清厭丹穴而不息  
鄙高岡而不鳴方為應至仁而來玄扈豈徒愛層構而  
集丹楹彼燕有巢已聞在幕之厄爾鶴稱德更擅乘軒  
之名一則兆啟乎顛沛一則僭處乎車蓋曷若我愛育



元和來儀昭泰奮美羽於軒楹散清音於埃塏然後知  
赤鳥不曰珍白龍不曰神或生之於苑囿或厄之於海  
濱四目鳴而不覩萬戶獻而莫臻豈若茲鳳惟閣是因  
三重其階實惟高矣顯矣一人斯覩誰謂不躬不親向  
非我后從政不拂惠生於物執德不回遺乎將來鳳亦  
遠矣誰能巢哉是知反道者高閣徒修悖德者鳴鳳罔  
萃竊稽瑞牒載覽史記惟黃帝與吾皇能感之而自至

鳳鳴朝陽賦

以鳳鳴山陽振  
翼飛舞為韻

唐

崔損

杲杲兮日景于彼朝陽萋萋兮桐葉于彼高岡來儀者  
鳳允叶禎祥瑞四靈之嘉號煥五彩之文章既和其音  
爰翥其翼淒唳響暢徘徊綢直旁應玄律調十二管於  
四時上陵紫煙擊九萬里而一息非丹穴勿處非蒼竹  
不食小鵬起於扶搖卑鸞棲乎枳棘若夫雞冠燕頤心  
遠貌閒雖衆禽之累百諒比德而難攀故其發聲也瞻  
白日以俯仰其餘響也順清風而往還浮泛泛以出谷  
靜泠泠而滿山既飄颻於有際遂遼賈於無間故曰鱗

之有龍鳥之有鳳偶時而見如哲士之間生取類而言  
同君子之異衆若乃拂杳冥而直上臨峻極而孤鳴虛  
籟相和陰深以竄篠霏煙動色紛郁而隨迎六合為之  
澄朗八風於是揚清川不波而昭其德地不翳而感其  
聲足使俗登仁壽化洽休平且夫朝陽者象明時之有  
潛鳳鳴者匹賢人之惟信鳳集朝陽以輕舉賢遇明時  
而易進整羽翮以迴翔望青雲以奮振有若秉節操而  
貞白垂簪纓而篤敬鳳兮鳳兮何德之威鏘鏘于飛應

有道而歲貢實無文而代希飲必玉池之津游必神仙  
之府矯翮則羣族咸從和樂而百獸率舞巢阿閣以應  
昌期棲丹闕而壯天宇載圖牒以傳記必表靈於聖主  
包衆美於流芳固難得而覩縷

龍馬圖賦

元趙森

混沌闢兮鴻荒人文杳兮未彰偉神聖之御極膺龍馬  
之嘉祥闡二五之妙數與日月兮齊光肇理象之權輿  
為卦畫之紀綱觀夫崑崙之發源動盪溶溢旋乾通坤

道體不息此乃滎河之波貫天河而為一方其宇宙盤  
辟神驚鬼泣虹流電繞光芒洞射倏騰驤於中流挺神  
物焉是出以為龍耶則非蚪非螭元氣淋漓狀天矯兮  
欲飛以為馬邪則匪驪匪騏奮鬣揚鬐勢駭躍兮奔馳  
意者天不愛道使之效造化之秘奧豁庖羲之神機也  
邪故其圖之負於背也則熒熒煌煌粲然有章一六惟  
水位彼北方二七惟火在於南行木居乎東則三八其  
配金奠乎西則四七是將卓天五與地十儼正位乎中

央分內外而定賓主列左右而隱低昂成變化而行鬼神體奇偶而道陰陽故大易以是而取法文籍於焉而濫觴也若乃乾坤定天地乎上下坎離列日月乎西東畫艮兌以象山澤畫震巽以為雷風以八卦而相錯則天下之事可備由十數而大衍則天下之用無窮此先天之圖所以則之於其始而後天之易所以成之於其終噫嘻有聖者作禎祥必臻孰俯仰以觀察默有契兮杳冥故斯圖之出河無乃天之待人豈元氣之磔裂將

不得以還淳乎抑人心之澆漓將日趨而失真乎何其  
天之畀於聖人者終不能以默默聖人之所以興神物  
以前民用者又若是之諄諄也吁聖轍一塗異世同符  
以鳥紀官因龜著書舜樂致乎獸舞文治洽乎騶虞何  
鳳兮之德衰感麟出之時殊嗟春秋之絕筆視畫卦兮  
焉如幸三絕兮韋編托十翼以演辭功有光乎前聖心  
猶切於斯圖斯時也吾知龍馬之復出愈感慨而增吁  
下迨明皇帝德靡初易無逸兮山水圖龍馬兮是娛不

能復皇羲之治適足為神物之汙又何待乎嘯嘯也方  
今聖皇御極握符闡珍應九五之乾龍開萬國之太平  
慶風雲之嘉會駿奔走兮來廷四靈繽紛兮駢集天馬  
鼓舞于前陳囿玄化之熙皞覽版圖之恢弘致瑞應于  
斯其時而龍馬之圖將出於幽并也

龍馬圖賦

元魯貞

邈太初以玄覽兮漸太昊之遺則當風氣之始開兮為  
天地以立極揭人文而昭著于開萬世之太平休光格



於上下兮叶神道於太寧何淵默之潛通兮致上帝之  
降精帝乃不愛其道兮肇錫之以嘉徵惟湯湯之河流  
兮洪洞渟渟散以舒徐長波沓沓颯以域域兮渺瀰漭  
漭赴以縈紆喬雲翳鬱噴以生煙兮英華翕葩爛以燭  
天曾霧霏微布以漫衍兮薰蒸混成配黎而相躔精氣  
旁薄彌乎四維兮五彩布濩的皪以塞川杳杳晦晦其  
中有物兮踴躍奔迅矯首而將驤曰其名為龍馬兮斥  
蹕卓越昂然而望背被鱗甲狎獵璀璨兮葦珠鏤瓊錯

以成章揚鬢奮鬣軒然四張兮若舒乍翕森以髻鬟鐵  
蹄雲身突如高舉兮躍波浪激肩雨而飛霜蠓略蕤綏  
幽繆宛轉兮忽隱倏形變而無方超越凌厲奄以馳騫  
兮急景冥濛豁陰而閉陽星流電縱揮以陸離兮毓質  
孕靈為時禎祥負圖於厥背兮闡斯道之至妙何聖人  
之一覩兮獨有會其旨要一與六之為水兮為玄冥之  
所廬二與七之為火兮處炎精以握樞惟三八之為木  
兮基蒼神而委精復四九而為金兮奠厥位乎素靈五

十由中而制外兮黃祗於焉而兆形羌周流乎上下兮  
妙陰陽之生成遂有契於斯文子析淵微而晶熒畫一  
奇以象天子一耦以象地由儀象以生八子實畫卦之  
攸始原先天之為位子乾坤上下其分翕震巽為陰陽  
之作始兮知往順而來逆復變而為後天兮崇離南而  
坎北位震東而兌西兮春秋對而不忒坤乾艮震之四  
維兮差有序而不易何畫卦之若斯兮揭玄旨以示人  
諒斯理之既著子開盲聾之誨誨服茲美而遂往兮吾

將求茲圖之所蘊命鳳凰以先驅予紛總總離離其並  
進駕鵬翼之大矯飛揚兮從以鯢鯨千里而一瞬鷁鷺  
申申相予之先後兮鮫蜃揮霍懼而膽胡驚驚為予啟  
路兮靈龜告予以吉占爾勉遊乎太虛兮惟宣聖之在  
天求微言以啟之兮指天路之平平撰予轡以於邁兮  
至清都而一息凌倒景之膠轕兮超蟻蝶之寥閬梁天  
津以徑度予魚紛紛其騰予聽天雞之咿嚶兮戒騰蛇  
之不可踰過九關之洞達兮夫何虎豹之屏跡也造天

闕之肅清兮夫何通衢之開闢也蒼龍白虎蹲踞乎左  
右兮蟠而屈律猛而睨暘朱雀褰翥翼而在前兮玄武  
拳縮軋以相得視寥寥而無見兮聽杳杳而無聞上晃  
晃以無闕兮下浩浩其無倫想玄聖之容儀子求一言  
以為師惟精神之感通子若有語子以其辭曰圖在天  
下兮無古無今太極陰陽兮在於一心反而求之兮斯  
得之深勿外之從兮以已為任聞茲言而休之兮將日  
修吾初服佩道德以為琚兮居仁義以為宅飾禮容以

為裳兮餐道腴以為食會茲圖於予心兮玩易道以自  
珍膺聖訓以書紳兮與先天而為鄰

龍馬圖賦

元李翼

鼇極立義皇出盛德昭皇風赫至和儲精大道發蹟滎  
河演漾厥有神物龍邪馬邪奇變不測實所以開萬世  
言語文字之源著萬代文明休祥之績想其毛骨絕塵  
逸氣空羣赭汗噴血玄蹄躡雲以為龍則軒軒驪黃之  
神駿以為馬則矯矯頭角之崢嶸豈馬高乎八尺亦以

龍而見稱拳背毛以成圖洩道妙於難名得神驂而氣  
御列奇陽而偶陰是圖也一六北水二七火南三八東  
木四九西金土宅厥中五生十成累累乎如井邑之布  
田野粲粲乎如星宿之列璣衡皇覽之而載嘻曰吾取  
法以作易謂太極之象存中虛五而暨十各二十之陰  
陽兩儀生而不息以一二三四為六七八九者四象之  
所得也析四方之合補四隅之空者八卦之所宅也皇  
闡之以示人契天心而為一發冥冥於昭昭曾何假於

智力後至夏后溫洛汭汭神龜負書背具綠文宣尼贊  
易圖書並云時有先後理無古今此靜對待彼動流行  
龍馬固神而龜亦靈假以呈象圖書一心或有詰予者  
曰子於圖信詳矣而於龍馬未有所辨何居予曰在乾  
稱龍抑又稱馬變化健行象兮特假安得見羲皇於先  
天聞諸形而上者

神龜負圖出河賦

以作瑞前王始  
啟文教為韻

唐 裴 度

茫茫積流祚聖有作動上天之密命假靈龜以潛躍蓋



欲以慶遙源敷景鑠寫物象之精密化人物之朴略豈  
不以河之德兮靈長龜之壽兮會昌載禎符先呈於古  
帝稱大寶後遺於寧王故將出也感天地動陰陽浮九  
折之澄碧散五色之榮光然後蹈箭流而泳花浪露玄  
甲而明繡裳初若沉圓璧而未沒稍似泛孤鳬而欲翔  
既而降芳蓮蹈清沚五老游而共覩列聖過而每喜出  
朝日如耀其實圖伏靈壇狀陳其鏤簋布文象之糾紛  
蘊天地之終始負謀謨之畫將化洪荒當授受之時豈

思綠水非臆對之可述諒鉤深而有致所以出河宗作  
天瑞馮夷倚浪以相送神魚鼓舞而旋避於戲冥數宵  
然自我而傳外骨明賁中心善泉將後天而思永豈為  
贄而居前至如魚託素以達情鳳銜詔而展禮未若祥  
開八卦兆動四體闡文教寧木鐸之足儔贄貞明與日  
月而同啟洎乎形貌既著品物類分縈萬化之茫昧合  
一氣之絪縕識用光於夏葉絲每煥於義文此乃天理  
用彰神道設教故躍波而委質殊以文而飾貌觸綸誠

怪於文鱗隱霧徒嗟乎玄豹此悠久也可是則是效

資州獻白龜賦

以秦平將合神物効靈為韻

唐

獨孤申叔

皇帝在位十五載西人獻異龜於王庭匪青黑以飾體  
特潔白而成形融彩可嘉且不溷於五色呈祥有異詎  
止齊乎四靈蓋以我皇行化無外止戈偃武人綏道泰  
升至德於玄穹降殊祥於神蔡且夫龜者稟先知之異  
白者表司殺之方豈天意興威於有感俾臣下受命而  
無將西土是生實西方而主義被甲以至猶帶甲以來

王不然何以暖純容皎素甲皓霜華而決洽炯玉質輝  
金精凝雪彩之清貞泳靈沼而永靜息泰階之砥平足  
使孟津之鱗恥捷乎素鬣越裳之雉羞奮於翹英矧乎  
稟殊姿體異貌陋三足之為美匪六眸以是效其用也  
或協聖人之心其動也克符智者之樂然後知戲朝之  
虎不足徵銜鈎之狼不足云彼駒來思徒稱皎皎爾獸  
至止虛擅諄諄未若茲瑞德無與鄰應天之命昭王之  
仁非櫝中之毀棄不蓮上以因循將順乃玄穹以呈其

貺曷思乎綠水而返其身則彼寧王有遺元緒又安得  
而比倫嚮非我皇從道不拂必將混於介族詎得分為  
理物宜乎冠異紀首靈篇且無使其湮鬱

瑞龜游宮沼賦

以題為韻  
有序

唐周存

王者嘉瑞曰四靈龜其一也皇帝握圖御寓十有一年  
秋七月旬有一日龜雄雌各一游於內池甲耀金毛文  
滋綠彩帝乃出示百官以議其瑞僉曰至德之應也少  
司成命文士賦以美焉敢布下才同夫體物賦曰

介蟲之長實曰靈龜明陰陽以應化察利害以俟時於  
穆我皇德無不被春國洋溢神物來萃雖四靈其必臻  
懿雙龜以時瑞陋衆水而不處選天池以自寄金甲炫  
晃帶壁日以流光綠毛丰茸度薰風而含吹不啁喋於  
蘋藻恣東西於荷芰爾其有金者剛有毛者柔示剛柔  
之合體表形德之具修昭品類之德性備雄雌以共游  
信皇德之上達俾靈物之告休觀乎巡金塘樂翠沼晦  
跡無競凝神不擾引脩頸而鳥伸動圓目而珠皎映紅

藻而灼爍吸清露之縹緲天資獨智笑漁者而紫羅人  
謀既臧鄙太卜之問兆若夫百莖著下九派江中順衆  
流而五色斯易邁千齡而片雲在空豈比夫承天眷感  
宸衷盼青瑣兮鄰紫宮顧宅中之可寶瑞皇室兮無窮

漳河赤鯉賦

有序

唐  
潘 炎

景龍三年春二月帝巡屬縣至於襄垣漳水有赤鯉躍  
聖帝之瑞也賦曰

魚在在藻兮躍於中流吾君戾止兮樂我王遊惟赤鯉

之呈祥殊白鱗之入舟非竹箭之危湍無聞點額同君  
明之望幸非為吞鉤豈其為祥必河之鯉用表皇族克  
繁帝祉雖云水物宜紫鼉綠黿之同身是曰元符亦亦  
雁丹鳥之可比頽鱗耀彩碧水無波非應訖巴之清角  
何言甯戚之高歌周文之時躍於沼漢宣之代舞於河  
且合符於圖牒宜入頌於猗那豈徒鏤甲葺鱗下沿上  
沂皆為儔匹文鯨是喻吐尚父之兵鈴傳遠人之尺素  
事稱嘉瑞匪琴高之所乘詩有樂胥似相如之獻賦





御定歷代賦彙卷五十五